



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8



Pakistan court kati Imran Khan indang sedition case agientsü

World Athletics Championships nung Chopra-i gold angu



VOL. XX NO. 317 (ADOK 317) DIMAPUR SANGTENNÜ (TUESDAY)

LUROI (AUGUST) 29, 2023

₹ 5.00

Nagaland nung ULBs atema senden amentsü

Kohima, August 28, 2023 (DIPR): Nagaland nung Urban Local Bodies (ULBs) dak sendakba onük lemsateptsü atema state sorkari senden ka amentsü ayongogo.

Sendenji September 1, 2023 nü State Banquet Hall, Chief Minister's Residential Complex, Kohima nung amentsü.

Iba Consultative Meeting nung Chief Minister, Deputy Chief Minister tem, NLA Speaker, Minister ajak, Lok Sabha & Rajya Sabha Members of Parliament, Advisor ajak, MLA ajak, Advocate General, Nagaland, Chief Secretary aser sorkar tongti ketdangsürtem adentsü.

Senden nungsa Uniform Civil Code (UCC) aser Forest Conservation (Amendment) Act, 2023 osangtem metetdaksütsü.

Consultative Meeting nung adentsü jaokertem: Central Nagaland Tribes Council, Eastern Nagaland Peoples' Organization

aser Tenyimi Union Nagaland Tirtem den nisung asemsem.

Angami Public Organization (Kohima), Ao Senden (Mokokchung), Chakhesang Public Organization (Phek), Chang Khulei Setsang (Tuensang), Nagaland Garo Tribal Council (Dimapur), Kachari Tribal Council Nagaland (Dimapur), Karbi (Mikir) Union Nagaland (Dimapur), Konyak Union (Mon), Khamniungan Tribal Council (Noklak), Kuki Inpi (Nagaland) Dimapur, Lotha Hoho (Wokha), Phom Peoples' Council (Longleng), Pochury Hoho (Meluri), Rengma Hoho (Tsemnyu), Sumi Hoho (Zunheboto), Tikhir Tribal Council (Kuisam), United Sangtam Likhum Pumji (Kiphire), Yimkhiung Tribal Council (Shamator) aser Nagaland Zeliang People Organization (Peren) Tirtem den nisung anana.

NLA nung tambusang Noke Wangnao arishi tembangogo



August 28, 2023 nü Dimapur nung MLA & Advisor Noke Wangnao den asüpila sentep sentong nung Nagaland Chief Minister Neiphiu Rio-i o jembiba angur.

Dimapur, August 28, 2023 (TYO): 14 buba Nagaland Legislative Assembly nung tambusang Noke Wangnao mapang tatsüka temang manemi aruba sülen Hombarü alima nungi pilaogo. Pa arishi küm 87 liasü.

August 28, 2023 anepdang Christian Institute of Health Sciences and Research (Referral Hospital) nung pa asü. Pai pa kinungsü aser tanur trok yutsür akümüli tembangogo.

Asür Noke ya regionalist tashitait ka liasü aser 1974 nungi pai Mon district kübok Tapi Assembly constituency nungi kümsük 10 ben tashi takok ngua MLA inyaka aruogo. 14 buba Nagaland Legislative Assembly nung pa Social Welfare department Advisor teinyakdak liasü.

Tanü Kuda village, Dimapur nung asür Noke'er kidang state funeral ka agi aser iba sülen pa tasü mang Mon district nung par tasoli nung aremsü atema bener ogo.

Tanü asüpila sentep sentong nung MLA P. Longon, Chingwang Konyak, Social Welfare Department Director, ENPO President, Konyak Union Dimapur, Konyak Baptist Church Dimapur nungi lennirtemi o jembiba.

Sentong nung mendenji Social Welfare Department Secretary Martha R. Ritse, IAS liasü aser State Chaplain T.W. Yamyap Konyak-i tembanga sarasademba sülen asür Noke nem Guard of Honour agütsü.

Chief Minister Neiphiu Rio-i anir Deputy Chief Minister Y Patton, Speaker Sharingain Longkumer, NDPP president Chingwang Konyak, Minister aser MLA aika asür Noke den asüpila sentep sentong nung aden.

"Asür Noke Wangnao ya tangatetba tajung nung noktakba aser regionalism pukümer takang ka liasü. Pai teküpoktiba jenjang nung alirtem den tesentaktep tajung ayu aser pai temlung nung bilemba o jembiba" ta tanü CM Neiphiu Rio-i o jembidang ashi.

"NDPP political party tentetba nung Noke-i tongtipang shilem agiba atema kanga pelar. Pa alima nung pila aoba ya par kibong atema dang masü saka Konyak aser Naga nungger ajak asoshi takoksa ulura lir" ta Rio-isa ashi.

Deputy Chief Minister Y Patton-ia o jembidang Noke Wangnao ya ochishir aser tangatetba nung noktakba nisung ka liasü ta ashi.

"Asür Noke-i Nagaland nung alirtem ajungkettsü atema bendanga agüja inyakogo aser pa teti bilemtettsü. Nagaland state BJP MLA ajak tenü nung asür kibong den asükhu lemsateper aser pa tanüla teti atema anisüngzük ngudakjang ta sarasademmer" ta Y Patton-isa metetdaksü.

"Noke Wangnao ya o aika mejembiba nisung ka liasü aser pa kanga ajemalu taküm ka liasü. Pai asüba ya state nung alirtem atema takoksa tulu lir" ta Deputy Chief Minister TR Zeliang-ia ashi.

"Noke Wangnao-i regional

party nung tenangzükba agiba nungi kodanga masetshii noktak. Pai küm talangka inyaka arudang national party kecha nunga maden aser pa arishi metembang tashi regionalist ka ama liogo" ta NDPP president Chingwang Konyak-ia metetdaksü.

"MLA aser Advisor Noke Wangnao asüba osang angashia kanga aoksar. Pa ya nübortem yariba lennir ka liasü aser pa asüba ya Nagaland nung alirtem asoshi takoksa ulura lir" ta Governor La. Ganesan-isa sangdong ka nung ashi.

"Pai Nagaland nung alirtem yariba kodanga mamatsü. Nagaland nung alirtem aser kü tenü nung ni tasür kibong aoshi tesü nep aser tashi meshia sarasademmer" ta Governor Ganesan-isa ashi.

Nagaland Pradesh Congress Committee (NPCC) züngsem ajaki asür Noke Wangnao'er kibong den mangyim lemsateper ta NPCC President S. Supongmeren Jamir-isa sangdong ka nung ashi.

"Asür Noke ya 1937 küm aso aser Tapi Assembly constituency nungi election 10 nung takok ngua aruogo. Pa ya Nagaland nungi lennir tajungtem rongnung ka liasü. Pa asüba ya Naga nungger ajak asoshi aser talisa Tapi constituency nung alirtem atema takoksa lir" ta NPCC sangdong nung shia lir.

"NPCC-isa tasür kibong nem tashi agüjang ta sarasademmer aser pa tanüla teti atema anisüngzük ngudakjangma" ta Supongmeren-isa metetdaksüogo.

Rozgar Mela: Nagaland nung nisung 14 nem 'appointment letters' agütsü



Dimapur, August 28, 2023 (TYO): Hombarü Assam Rifles Training Centre & School, Shokhuvi nung Rozgar Mela indang tuba sentong ayongzüka agiogo.

Iba sentong nung Minister of State for External Affairs & Education, Dr. Rajkumar Ranjan Singh-i appointment letters lema agütsü.

Nagaland nungi nisung 134 nem central armed police forces nung inyaksü atema appointment letters agütsüogo. Nisung 84 Assam Rifles, 24 CRPF, 21 BSF, 5 SSB aser 2 ITBP nung mapa inyaksü.

"Rozgar Mela ya Prime Minister-i shisatetba mapatong ka lir. Linük nung ochishia sorkar recruitment processes inyaksü nükjidong nung iba mapa tenzük. Iba ya lanur dak rangloker inyakba mapa tajung ka aser sorkari ketdangsübaren nung temelenshi bener aruba mapa ka lir" ta Dr. Ranjan-isa ashi.

Centre sorkar iba mapa nung dang masü saka "Mission Karmayogi" aser "Karmayogi Prarambh" maparen ajanga sorkar mapa inyaker tajungtem

shima arur, ta paisa ashi.

Paisa mapa angurtem dang külem senso tenzüksü tangatetba nung inyaka aotsü ayongzük.

Mezüngbuba Rozgar Mela ji October 2022 nung agi aser tanü agiba ya 8 buba lir. Iba sentong ya India kübok tesem 45 nung ayongzüka agir ta Union Minister of State-isa metetdaksü.

Tanü Prime Minister Narendra Modi-i video conferencing ajanga nisung 51,000 tema nem appointment letters agütsüogo.

Iba Rozgar Mela ajanga Ministry of Home Affairs (MHA) ajanga Central Reserve Police Force (CRPF), Border Security Force (BSF), Shashtra Seema Bal (SSB), Assam Rifles, Central Industrial Security Force (CISF), Indo Tibetan Border Police (ITBP) aser Narcotics control Bureau (NCB) den Delhi Police nung nübo tasentem shimokogo.

Tanü mapa nung shimokertem ya Ministry of Home Affairs (MHA) kübok Constable (General Duty), Sub-Inspector (General Duty) aser Non-General Duty Cadre Posts inyaksü.

NLA Speaker-i Commonwealth Parliamentary Association mungdang nung aden

Kohima, August 28, 2023 (DIPR): NLA Speaker Sharingain Longkumer den külemi Nagaland Legislative Assembly Secretary-in-Charge Khruohituo Rio nati 9 buba Commonwealth Parliamentary Association (CPA) India Region Conference nung denogo.

Iba mungdang ya August 20

nungi 23 tashi Udaipur, Rajasthan nung agia liasü. Iba mungdang Lok Sabha Speaker Om Birla-i lapoktsü.

Mungdang nung CPA Headquarters, London MP & Chairperson, Rajasthan Governor, Rajasthan Chief Minister, Rajasthan Legislative Assembly Speaker, Rajasthan Legislative Assembly Leader of

Opposition aser Rajya Sabha Deputy Chairman nungeri o jembiba.

Mungdang nungsa NLA Speaker Sharingain-i "How to make Public Representatives more Effective/Efficient in encouraging Good Governance through Digital Empowerment" olemtep nung shilem agia liasü.



R.C.Chiten Jamir Memorial Govt High School, Changtongya nung parnok Sobaliba anogo nung kaketshirtemi shilem agiba noksa nung angur. Iba school ya Mokokchung district nung Govt High schools mezungpurtem rongnung ka lir. Iba school tenung ya Nagaland akümertem rongnung adener aser taoba Deputy Chief Minister asür Lt.R.C.Chiten Jamir naroküm agüja melenba lir. (August 28, 2023.)

Nagaland nung Agniveer recrui-ment September 13 & 14 alitsü

Kohima, Luroi/August 28 (TYO): Indian Army ajanga April 17 nungi April 26 tashi agiba Online Common Entrance Examination nung pass asüba candidate indang result 'Joint Indian Army' website nung inokja lir, ta sangdong ka ajanga ashi.

"Shortlisted" aser 'not shortlisted' candidates tem nem pei indang mail ajanga osang agütsüogo.

Shimteta aliba (shortlisted) candidate temi aruya aliba rally

asoshi pei indang login credentials amshia Admit Cards download asütsüla, ta ashi.

Nagaland nungi shimteta aliba candidate tem asoshi recruitment rally ya Army Recruiting Office, Rangapahar ajanga September 13-14, 2023 anogotem Rangapahar Military Station, Dimapur nung agütsü.

Candidate tem tiazü nung mapa agütsütsü nangzükba nem memesüzdaktsütsü ajungshir. Indian Army nung nübu shimba ya 'merit' nung ajemdaker lir aser

temolung malemtü kar lira, candidate temi anasatiba Army Unit / Head Quarters / Nagaland Police Station mesüra Army Recruiting Office, Rangapahar nemo sang agütsütsüla, ta Indian Army sangdong ajanga ashi.

Admit card mangu aliba shortlisted candidate temi email ID - swarkokila@nic.in aser mobile number 89749 58673 amshia Army Recruiting Office, Rangapahar nungi admit card meshitsüla, ta sangdong ajanga ashi.



C-Edge College pur August 21, 2023 nü World Entrepreneurs Day aser The Entrepreneur 2023 final agia liasü. Küm shia World Entrepreneurs Day ya Department of Management Studies ajanga ayongzuka amunger. Taküm iba anogomung ya "Celebrating Women Entrepreneur" omen nung ajemdaker amung, kong Women Entrepreneurs Network Nagaland (WENN) züngsem Akumjungla Jamir, Zakietsono Jamir, Kewengule Therie aser Vekutholu Vero nungertem dena liasü.

Kija aser telok balalai Advisor Noke Wangnao asükhu lemsateper

Dimapur, Luroi/August 28 (TYO): Advisor, Information & Public Relations, Soil & Water Conservation, Imkong L. Imchen-i Dimapur nung August 28, 2023 nü Advisor, Social Welfare, Noke Wangnao asüba atema asükhu lemsatepa liasü.

Asür Noke ya Nagaland nung Regional Politics indang lenir tajung rongnung ka liasü aser Nagaland Legislative Assembly nung inyaksü tokuben tashi nüburtemi shima liasü, ta Advisor Imkong Imchen-i ashi.

Pai teti ochi dang jembia aru aser Naga Politics nung tejangja nübu ka liasü, ta ashi. House nung Noke Wangnao malitsüba ya mamangteter, ta ashi.

Pa asüba ya 14th Nagaland Legislative Assembly, Nagaland nung aliba nüburtem aser talisa Konyak nung asoshi takoksa tulu alitsü. Mangyim tejashi nung alirtem molungjang nung tesuneptsüba agütsütsü aser asür tanüla teti tatem maka tesunep nung anisüngzüksü Tsüngrem dang sarasademtsür, ta Advisor Imkong-i ashi. Referral Hospital (CIHSR),

Dimapur nung August 28, 2023 nü Advisor, Social Welfare, Government of Nagaland, Noke Wangnao Konyak ajungbena asüba angashia aoksar aser jashir, ta Eastern Naga National Workers Union (ENNWU) sangdong ka ajanga ashi.

Pa ya Nagaland nung yimten yimsüsür tsütsü nübu tejen aser Mon kübok 43 Tapi A/C nungi liasü.

Pa ajungben asüba ya Naga nung aser Eastern Naga nung asoshi takoksa tulu alitsü, ta ENNWU convener aser Collective Leadership Member (CLM), Moba Chang ajanga ashi.

Pa anujungi asüba ajanga tawa adokba asüngtsü kanga tasak asütsü. Eastern Naga National Workers Union (NSCN) ajanga mangyimer kibong den asükhu lemsateper, ta sangdong ajangasa ashi.

NLA nung ter ben züngsema alisang Noke Wangnao asübang osang angazüka kanga sasar aser aoksar, ta Janata Dal United (JDU) sangdong ka ajanga ashi.

Konyak Naga kin nungi pai Nagaland nung aliba nüburtem asoshi mapa tajung inyakogo. Pa asüba ajanga state nung tawa adoktsü aser pa ama temelener adoktsü tasak asütsü, ta JDU sangdong ajanga ashi.

MLA & Advisor, Social Welfare, Noke Wangnao ajungbena Dimapur nung August 28, 2023 nü asüba osang angazüka Nationalist Democratic Progressive Party (NDPP) aoksar aser kanga jashir, ta NDPP tir Chingwang Konyak ajanga sangdong ka nung ashi.

Asür Noke ya NDPP nungi legislator tambosang dang masü 14th Nagaland Legislative Assembly nunga züngsem tambosang liasü, shiba 43th Tapi Assembly Constituency nungi NLA nung tokuben tashi shima liasü, ta ashi.

Yimten yimsüsüba nung mapang talangka tetsüng ajemoker arudang Asür Noke-i regional party asoshi bendanga agütsür inyak aser national party nunga adentsü

Dimapur nung mejangjaba nisung tasü mang ana nguteta lir

Dimapur, Luroi/August 28 (TYO): Mejangjaba nisung tasü mang ana Railway Station, Dimapur nung KM 257/6-7 nung DMR-RXR section tsünga lir ta Station Manager, NF Railway Dimapur nungi August 27, 2023 anepdang 2:30 ako meta Govt. Railway Police Station (GRPS), Dimapur dangi tezüluba ka nung osang arua liasü.

Iba osang nung ajemdaker duty nung alirtem tasü mang alidaki ao aser mejangjaba nisung ana (anaprong tebur aser non-local) tasü mang railway track telunglen aser temalen liasü.

Nisung ana ya train agi menüngset südi ta temolung

melemi lir. Police temi tasü mang ana ya jangjatetsü kanga meranga liasü, saka ID cards mesüra mobile phone nungera meliasü.

Ozüng agi melaba ama maparen ajak inyakba sülen tasü mang ya post-mortem examination aser jangjatsü asoshi District Hospital morgue nung yua lir.

Tena ya ka T-shirt sentsü tanak aser ka half pant sentsü tanak aser vest temesüng agir liasü.

Kinunger/kibur/tembar temi Officer-in-Charge, GRPS, Dimapur den Mobile No. 7085055021 ajanga

tongteprateptsü akok, ta sangdong ka ajanga ashi.

Excise Department ajanga temesepba mozü apu



Dimapur, Luroi/August 28 (TYO): Nagaland Excise indang STF duty party ajanga August 27, 2023 nü DC Court Area, Dimapur nung aliba ki ka nungi heroin (sunflower) tuozük gram 340 ngutet aser iba dak sendakba nung arishi küm 27 tain Qhetovi'er jabaso Izaki

Kiho apu, ta sangdong ka ajanga ashi.

Iba mozü apuba dak sendakba nung NDPS Act 1985 kübok ken o ka zülüoka lir aser tai tonglokja alisang ya Court nem agütsüogo aser bushisüngdang tenzüka lir, ta sangdong ajanga ashi.

maongka aruaka pa tasünü tashi regionalist dang liasü.

1974 küm nungi pai politics nung tetsüng ajemoker arudang nüburtem ajungtsü asoshi pai bendanga agütsür nokdak. Office balala nung inyaka arudang pa nem nungloksüba mapa temolung agüja aser ochishia inyaka aru.

Pa asüba ya NDPP dang masü saka state asoshi arishir ka samaba alitsü, shiba indang shisatsü temelen angutsü tasak alitsü aser pa teti menungratsü, ta sangdong ajanga ashi.

Party aser Nagaland nung aliba nüburtem, aser talisa Eastern Nagaland asoshi lenir tajung ka samaogo, shiba aika asoshi teboti ama liasü.

NDPP züngsem ajak den ni aser ozü kibongi Asür Noke Wangnao kinungtsü Phamyung aser par kibong den asükhu lemsateper, ta sangdong ajanga ashi.

Ozü züngsem aser MLA aser Advisor, Social Welfare, Noke Wangnao ajungbena Dimapur nung asüba osang angashia asükhu lemsateper, ta Nagaland Legislators Christian

Fellowship ajanga sangdong ka nung ashi.

Asür Noke Wangnao ya Tsüngrem tsüpoba lenir ka liasü, anungji pa asüba ya Fellowship aser state asoshi Tsüngrem tsüpoba lenir ka samaogo.

Asen Tsüngrem den na tesunep nung anisüngzükangma. Nagaland Legislators Christian Fellowship tenüng nung mangyimer kibong den asükhu lemsateper, ta Rev. T. W. Yamyap Konyak, State Chaplain, Nagaland Legislators Christian Fellowship ajanga ashi.

Department of Social Welfare indang Advisor, Noke Wangnao, Dimapur nung asüba osang angazüka temolung khurema jashir, ta taoba minister, Neiba Kronu ajanga sangdong ka nung ashi.

Maneni Minister, Health & Family Welfare, P. Paiwang Konyak, Konyak Legislature, Deputy Chief Minister TR Zeliang aser Minister, Power, GK Kenye nungeria Asür Noke Wangnao asükhu lemsatepa liasü.



August 28, 2023 nū Rashtrapati Bhavan Cultural Centre, New Delhi nung Tir, Droupadi Murmu-i taoba mapang Andhra Pradesh Chief Minister, asūr, NT Rama Rao kum 100 ajungba nungtem nung adokba sen jandi sayatsūdang tangokba noksa nung angur.

ISRO-i anū study asütsü atema Sept. 2 nū Aditya-L1 khatettsütsü

New Delhi, Luroi/August 28 (Agencies): Hombarnü Indian Space Research Organisation (ISRO)-i, ISRO-i anū study asütsü atema September 2 nū Aditya-L1 khakettsütsü, ta metetdaksü. Aditya-L1 mission ajanga India nunger space-based observatory amenoktsü. Ibaji Andhra Pradesh kübok Sriharikota nung aliba Satish Dhawan Space Centre nungi khakettsütsü. Aditya-L1 mission ya taruba India nunger space

programme shilem ka lir. ISRO-i ita aser anū ama alima balala tejangjaba angatettsü atema rangloker inyaker. ISRO-i twitter ajanga, tejangrartemi 'link' ka nung register asüba sülen Sriharikota nung aliba Launch View Gallery nungi Aditya-L1 khakettsüba reprangtettsü, ta metetdaksü. Aditya-L1 mission nungji payloads tenet alitsü aser item jagi magnetic field, solar winds aser electrons densema lenla aika study asütsü.

Aditya-L1 ji PSLV rocket ka ajanga khakettsütsü aser spacecraft ji Low Earth Orbit nung toktsütsü. Iba nungjagi spacecraft ji maneni Lagrange Point 1 (L1)-i aotsü. "Lagrange Point 1 (L1) ya alima nungi kilometer million 1.5 shi pilar lir. L1 nungjagi Aditya-L1 indang payload pezü ajanga anū reprangtsü aser payloads asema Lagrange Point L1 nung study balala agitsü," ta ISRO-i parnok indang website ajanga metetdaksü.

INDIA teloktep indang 'logo' August 31 nū sayatsü: Nana Patole

Mumbai, August 28 (Agencies): Hombarnü Maharashtra Congress Party Tir, Nana Patole-i, August 31 nū Mumbai nung ayongzükba senden nung Indian National Developmental Inclusive Alliance (INDIA) indang logo sayatsü, ta metetdaksü. Osangbener den jembidang Patole-i, opposition teloktep senden nungji Congress Tir Mallikarjun Kharge den Sonia Gandhi aser Rahul Gandhi nungera adentsü jangjaogo, ta metetdaksü. "Iba senden nung Sonia, Malluikarjun Kharge aser Rahul Gandhi nungeri shilem agitsü. MVA (Maha Vikas Aghadi) tenüng nung iba senden atema ajak renemogo. Iba senden ajanga linük nung sangdong tulu ka agütsütsü. Yangi (Mumbai) August 31 nū INDIA teloktep indang logo-a sayatsü," ta

metetdaksü. Sangkum Lok Sabha election agitsü lia opposition teloktep senden mezüng Patna nung ayongzükba amen, iba sülen tanabuba sendenji Bengaluru nung ayongzük aser tang Mumbai nung August 31 aser September 1 anogotem nung ayongzükba amentsü. Indian National Developmental Inclusive Alliance teloktep nung Congress densema opposition party 26 lir aser taruba senden nung ano party kar adentsü akok. Congress party telung osang ka ajanga ashiba agi, Mumbai nung ayongzükba senden nungji party 27 shi adentsü akok. Taruba senden nung adentsü atema Swabhimani Shetkari Saghtana (SSS) party-a jaokogo. Mumbai nung ayongzükba senden nung sub-committee ka

tentettsü atema jembitsü aser state jenjang nung teloktep atema group public senden amentsü atema-a jembitsü. Kasa senden nungjisa INDIA teloktep atema Convenor ka shimtsü atema jembitsü. Mumbai nung INDIA teloktep senden ya Uddhav Thackeray-i aniba Shiv Sena (UBT)-i ayongzük aser iba senden nung opposition party balala nungi lenirtemi taruba Lok Sabha election nung BJP-i aniba NDA telokatep anema tokteptsü atema asalentong yanglutsü. August 31 nū Uddhav Thackeray-i opposition lenirtem atema chiyungba sentong ka ayongzüksü aser September 1 nū senden tembangba sülen osangbenertem senden ka ayongzükba opposition lenirtemi jembitsü.

Audit report ajanga sorkar ochimashi jungkai adoktsüogo: MK Stalin

Chennia, Luroi/August 28 (Agencies): Tamil Nadu Chief Minister, MK Stalin-i, tawa sayaba Comptroller and Auditor General (CAG) Report ajanga Centre nung sorkar ochimashi onük tenet jungkai adokdaksüogo, ta metetdaksü. CAG Report nung ajemdaker MK Stalin-i, ochimashi tenetji- Bharatmala project, Dwarka rapid transit project, toll booth saru, Ayushman Bharat scheme, Ayodhya development project, rural development indang project ka aser Hindustan Aeronautics Limited (HAL) airplane construction scheme nung lir, ta metetdaksü. Thiruvavur nung CPI lenir, M Selvaraj kiyimba sentong nung adenba sülen osangbenertem den jembidang Stalin-i, "CAG ajanga project tenet nungji ochimashi aliba metetdaksüogo," ta ashi. Paisa, "Ochimashi alibaji Centre sorkar kübok inyakba

CAG ajanga metetdaksüba lir. Iba ya onoki aitsüba masü," ta metetdaksü. "Küm shia CAG-i sorkar inyakyim indang report renemer. CAG-i sorkar indang income aser expenditure asadanger, iba sülen report agütsür. Ibaji CAG indang mapa lir. Tanübo CAG-i Centre nung ochimashi yimsüsüba lir, ta ashir aser sorkari schemes aika nung ochimashi lir. Iba ya onoki ashir masü," ta pai metetdaksü. CAG report nung ajemdaker MK Stalin-i, "Ayushman Bharat scheme nungi tajangzük angur lakh 7.5 bo taila phone number 99999 99999 den 'link' süa liasü. Iba scheme kübok shiranger 88,760 süogo saka parnok asüba sülen-a parnok treatment atema insurance sen agütsü. Iba scheme nung temsüa maliba kibong aika bendenloka sen crore 22.44 auyaogo. Iba ya onoki ashir masü saka CAG report ajanga ashir," ta metetdaksü.



August 28, 2023 nū Kolkata nung Trinamool Congress (TMC) Foundation Day sentong nung TMC MP, Abhishek Banerjee-i jembidang tangokba noksa nung angur.

BJP-i taküm December nung Lok Sabha election ayongtsüa akok: Mamata

Kolkata, Luroi/August 28 (Agencies): Hombarnü Trinamool Congress (TMC) tongti lenir aser West Bengal nung Chief Minister, Mamata Banerjee-i, BJP-i taküm December ita nungsa Lok Sabha election ayongzüksüa akok; iba election nüboyim atema BJP-i helicopter ajak mekazüka yuogo, ta metetdaksü. TMC youth wing rally nung jembidang Mamata-i, BJP-i kümzük (term) tasembenbuba yimsü süra linük nung kijai tashi amshitsü atema inyaksü, ta ashi. Chief minister-isa, ozüng alema firecracker factory nung tapoktsü apokba tatalokba nung ajemdaker nisung kari ozüng alema inyaker; police kar teyari agia iba maparenji inyaker, ta ashi. "BJP-i kümsük tasembuba takok ngura linük nung kijai yimsüsüba arutsüa akok. Parnoki taküm December ita nungsa Lok Sabha election ayongzüksüa akok, ta ni arendaka bilemer," ta lai ashi.

"Saffron party-i iba linük ya yimsü balala amangertem tsüngda tsükchitepdaksüba linük ka kümdaksüogo. Parnoki maneni tashi ngura asen linük ya tesempa aliba linük ka kümdaksütsü," ta Mamata Banerjee-isa metetdaksü. "BJP-i Lok Sabha election atema nüboyimtsü asoshi helicopter ajak mekazüka yuogo, aser ibaji tanga party tem nüboyimba mapang mamshidaksütsü atema lir," ta lai ashi. Mamata-i, "Bengal nung küm 30 tashi CPI(M) yimsüsüa aruba sülen ni parnok tamakok ngudaksü aser Lok Sabha election nunga BJP tamakok ngudaksütsü," ta ashi. Jadavpur University nung 'goli maro' ta yimyim ayimba atema ABVP aser BJP züngsemtem aija Mamata-i police dang iba University nung tesempa yimyim ayimertem aputsü tuyu. "Iba ama yimyim ayimertemi iba ya Uttar Pradesh masü saka Bengal lir, ta mamadoktsüla," ta lai metetdaksü.



August 28, 2023 nū New Delhi nung Rozgar Mela sentong nung Union Ministers of State, Jitendra Singh, Meenakashi Lekhi aser Anupriya Patel nungeri mapa nung tang tasen shimokertem nem appointment letters lema agütsüdang tangokba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, LUROI(AUGUST) 29, 2023

Nagaland nung senso

Alima shisatsü aser rongsen tsütsü Nagaland state ya junga merenloker, anungji temulung masüba aika lir. Ajsüaka, nütsüngbo kanga renloker asünungji Nagaland nung alirtem rongnung shirnokbo bendanger aser shirnokang senso pur asütsü ta asüba temeten ozüng lateta akabatem mamadoki akangshia amshitsü kanga nüngdaka kümogo. Atangji, Nagaland ama nütsüng ishika dang aliba state nung nütsüng renlokba osangji tajung amai, ajsüaka kodang nütsüng renlokba jenjangji asadangdir, Nagaland nung alir Naga nung ka renlokdang, Nagaland nung alir bendangerbo ana renloker, ibaji Nagaland nung alir Naga nung asoshi shisabolutsüka lir. Iba amaisa kecha tenokdangba aser tazükba ka mekai Nagaland nung bendanger o senso na mebendang, nütsüng renlokdaktsü nungbo küm 80 sülen taruba alima aso nungjibo Nagaland nung Naga nung zü adenba sensosangertem ya tanü bendangertem arua alir chir aser semchisemnurtemi amokseptsü. Asenoki asen tia angatetsüba kaji, tanü Nagaland nung nütsüng renlokba ya tetsüi asoba kisüng agi masü saka tangar bendangertem India tesem balala nungi aser Bangladesh nungi dena asen limai ayangi arur aser parnokji asen kidang aser asen lu nung mapa inyaka kibong tulu akümer. Ano külen tanü asen lima nung tanur asoba jenjang reprangdangra yimtsüng aika nung küm shia tasortem dang nungibo tasürtem teimba, anungji asenok Naga nungertembo yim aika nung nisung ana süli, ka soli ta meteta aser memeteti nütsüng ajemba mapang lir. Iba ama tia ka nung, Nagaland nung senso masüba purtema aikati Nagaland senso kümner aser ozüng alema bendanger aika Nagaland senso kümogo. Anungji, parnokji tangbo Nagaland ajaklen mesüaka Dimapur nungbo kiojen tulu tajung yanglua kibur kümer lidagi. Atangji, Nagaland nungbo Naga nung masür bendanger shinga Nagaland senso mekümdaktsütsü ta mali mesüra Naga nungersa asüyonga tanga state nung alir Naga nungerto ajak Nagaland senso asütsüla ta-a masü. Nagaland nung senso asütsüba Naga nung süli mesüra tangar tsümartem süli, 1963 küm December ka nü tashi Nagaland nung arua alirtem aser parnok chir semchirsemnurtemji Nagaland senso asütsü temeten agüja lir. Itemji Nagaland mezüng Electoral roll agi bendangtsü. Iba ozüngji alema kodang asenoki bendangertem nem Nagaland senso agütsüdir, iba anogoji asenok Naga zü adenba Nagaland senso purtem bendanger tenzüka alitsü tenzüker asütsü. Iba tebilemstüji reprangteta mapang shia Nagaland Tribes Council-ibo ola adoker saka Nagaland nung alir Naga nungertem tenaronga marepzür. Ashiko, Nagaland nung alir Naga nungtemi iba lendong timtem arutsüba tesem aser tensa tiaji mereprangteter asütsü akok. Atangji, relief jang seret asem pezüka meshia yur election sen agi aon alia chir mejanga kazür okara purtemi bendangertem kübok alitsü tenzüka tensa tiaji memetetsü. Asenok ya temang nung tango mesatempa agidang tenük o tepin na masü dang ashi, asenok ya tasü den kasa, kechiyong bendangertem asen temeten bener oaka aser asen yimten aser lokti amokseptsü merangaka marakzür aser ola madoker. Iba jagi, tanübo Nagaland Legislative Assembly nunga Nagaland nung alir Naga nung senso temeten indang telemtetba magitet kangshiba angur. Tanü asenoki asen temeten asoshi ola madokra, asüng asen chirnurtema parnok lima nung ola maka akümstü.

OLEMSABANG

BIBLICAL CHURCH MODEL (BCM) INYAKYIM

~ L. Kika Pongener.

2nd August Tir Yimyim Olemsabang nung, ni "Biblical Church Model (BCM) ya Ao arogo ajaki agizüktsüla" ta...Ocet züluba nung, Lennir Limawati Longchar, Kohima, pai kü dang jangshitsütsü asüngdanga, 27th August Tir Yimyim Olemsabang nung züluba ama yamai rajemtsür : Mezüngbuba nung ni yamai angateta alitsü mepeshir...Ni iba ocet nung Biblical Church Model indang teratet züluba masü, saka Biblical Church Model inyakyim ABAM-i lateta aliba nung "Ni junger ta agizüksetba"...Onuk kar lemsatempa züluogo. Aser ABAM-i lateta aliba ama lim arogo ajaki liromedema inyaka benshia aonungbo kanga jungla ta züluogo. Angazükba agi, tang tashi nung ABAM küpok lim arogo 60-70 tashi ka nungbo 'Biblical Church Model' (BCM) inyakyim ya agizüka benshia odagi. Ozü kibong adenba arogo-a iba 'Biblical Church Model' inyakyim nungji anidaka arogo inyakyim ajak kanga tajungba melenshir odagi. Anungji Biblical Church Model (BCM) indang teratetji, ABAM nung lenir, tenzüker aser lai poti meteter kari tejangja rateta zülu nungbo ajak asoshi kanga terajemba asütsü. Nia laishir ka masü Layman ka dang, anungji ni Doctrinal nungi masü, saka ni angazüka aruba aser kü tangatetba nungi, ni kechi junger ta angatet aji nuburtem den lemsatempa züluogo.

Anungji Lennir Limawati Longchar, pai kü dang jangshidaktsünua asüngdangba onuktemji, ni angazüka aruba, ni laishiba nung züngshiba nungi, ashiko, tabensa/terajembo masütsü akok, mesura shidakbajia masütsü akok, saka kü tangatetba nungi tongmelang agi yamai rajemtsür :

Q.1. Laishiba arogo (Biblical Church) ta asüba ya koba arogo ashirba ?

Ans: Laishiba-i tuyuba arogo (Biblical Church)-ji tesem balaka nung, nungja balaka jateter aliba, arogo ka indang ashirba masü, tang ABAM küpok aliba arogotem nung inyakyim kar tajungba melenshitsuaba indang jembirba dang. Aji oda, tang aliba arogotem ajunga ya Laishiba-i tuyuba nung amendaker aniba arogo lir. Arogo ya jatetbapurtem longjemer akümba telok (1Peter-2:9-10). Shirnoki Yisu Khristaji kü kümtedakba aser Kibur ta agizüka amanger, itemji senteper arogoji tenzüker. Ano shirnok temulong meyipa tzü nung Baptir, parnokji arogo nung züngsem akümer (1 Kor-12:13). Ni amanger ABAM küpok lim arogotem ajunga ya laishiba tuyuba nung amendaker aniba arogo (Biblical Church) asütsü.

Q.2. Laishiba Arogoji shiba tentet ? Tamangertem sentepa arogo tenteter parnok anitsü aser parnok dang sayudaktsütsü Pastor/Sannuker anir aru asü, Pastor/Sannuker, tamburtem jaki nung/temulung meyipertem anitena arogoji aküm ?

Ans: Yisu Khrista sur shia arur kodaki tur külen, "Tenem-nu Benjong" anogo nung, nungtem tesem ka nung sentepa alidang, aoksa-a Kodak nungi mepong tesashi aonba ola ama aru, aser parnok alidak ajak Tanela Temeshi agi asüng (T.Mapa-2:1-2). Aser Peter-i anir nungtemi, Yisu Khrista indang tasü-ita sayutsüngi (T.Mapa-2:14). Iba anogo nungji pa o agizüka temulong meyipa amangertem, nisung merijang asem shi tzü nung Bapti aser nungtem den zünglok. Iba anogo nungji Yirusalem nung mezüngbuba arogoji tenzüker (T.Mapa-2:37- 42)...ta ni angazük. Iba arogo-jia Yisu Khrista agizüka temulong meyipapurtemi tenzüka asünung...Laishiba tuyuba arogo (Biblical Church)...ta angateter. Aji oda, koba arogo-sa Yisu Khristaji kü kümtedakba aser Kibur ta agizüka, temulong meyipa, tzü nung Bapti-bapurtemi tenzüker, iba arogoji (Biblical Church)...ta angateter. Arogo nung shidakba Kiburji/Tekolaki Yisu Khrista lir, saka pa melena arogo acha-ayanga anitsü asoshi arogo purtemi Pastor/Sannukertem shima nungloksür anidaktsür.

Q.3. Laishiba arogo Pastor/Sannukerji taah/itasen (renumeration/regular salary) aser tanga nungdak (facilities) agütsü asü ?

Ans: Tenyartem mapang tenzüka arogo nung...Pastor/Sannukertem nem taa/itasen agütsü asü magütsü (?)...iba indang laishiba nung shia mali. Yisu alima nung alidang...Pai nung ter-ana Israel kidong santem dangi yokdang yamai ashi... "Nenok juli nung hon, taribi aser sen teben...Kechiaser inyakerbo pei chiyungtsü angutsü tetemtsü" (Mathi-10:9). Ano Tenyar Paul-ia yamai ashi..."Nashi mo anetdang nai pa tebang tesembangtsü"... "Aser inyakerbo pei taa angutsü tetemtsü" (1 Timoti-5:18). Aji oda, iba o ya, Tsüngrem tenzüker nem taa agütsü indang ashiba sudi ta angateter. Tanü-a alima tensa den apet, Khristar arogo shia-i pei tashi yari Tsüngrem tenzüker nem taa/itasen aser nungdakbatem agütsür.

Q. 4. Arogo tamburtem menden, Dikon menden aser mapangser liasü asü ? Dikontem rongnung tetsüra liasü asü masü ?

Ans: Tenyartem mapang nung arogo tenzükli, nungtem tali renloka aodang...Amitsürtem chiyungtsü shilem agi mataba meji nung Yihuda nungeri Greek nung tenung sena-adok. Anungji Tenyartem Tsüngrem o sayudang...Chiyungtsü anganutsü asoshi Dikon tenet (7) shimba angur (T.Mapa-6:1-6). Ajiser, alima tensa den apet, arogo mapa tashi-taitba bener aotsü asoshi...Mapangser aser tenuk-telen balala shima ao sudi. Tanübo Dikon menden nung tetsür tebur tebandang meli-i liromedema tenzüktetsüsa tangatetba kati aruogo. Aji oda, iba ya-a temelenshiba inyakyim tajung kata...ta bilemer.

Q. 5. Arogo nungji Tetsür, Lanur aser Tila tanür Department/Ministry etc. liasü asü masü ?

Ans: Arogo tenzükli par putu den apet...Tetsür, Lanur aser Tila tanür Department/Ministry telemsa meli-i aruogo sudi, saka tanübo Khristar arogo ka nung shinga mesentoktsüla...ta angateta Tetsür, Lanur aser Tila tanür Department/Ministry balala tenteta inyaka aoba ajanga, arogo nung nungtem tulu-tila ajunga liromedema shilem agitsü maongka angur.

Ano 26th August, Tir Yimyim adok, Tapak-5 nung, "Laishiba tuyuba Arogo angazükshiyim agiogo" ...ta adokba nguogo. ABAM Church & Mission-i ayongzüka Zone 1 & 2 nungi, Impur nung arogo-35 aser Fellowship-3 nungi tenzüker 142 tashi adenshir iba sentong agiba nguogo. Ashiko, iba ya-a Biblical Church Model (BCM) inyakyim dak sendakba angazükshiyim sentong agiba asütsü sudi. Anungji ni angazüka aruba aser laishiba nung züngshiba nungi tongmelang agi iba amaji rajemtsür. Aji oda, kü dang nungi tabensaba/terajemba laishir/lennir kari zülura aji kanga agia terajemba asütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

New Jersey nung nisung kati pastor Timothy khasettsü merang



Pastor Timothy Huff aser pa kinüngtsü Hudson-Huff

August 28, 2023: New Jersey nung nisung kari pastor ka khasettsü merang, ajisüaka injang agi mejungi yiruba dak alaka pa takumbo kumzükogo.

Pastor dak injang khaloktsürji tetsür ka asütsüa akok, ta CCTV noksa nung ajemdaker police-i metetdaksü.

Brihostibar (August 24) anepdang züngia East Orange nung aliba Green Pasture Missionary Baptist Arogo nung pastor, Timothy Huff dak nisung kati teku nung injang khaloktsü.

Pastor Timothy'er jabaso meyong gari raksatsüba atema par kibongi police nem iba

osangji metetdaksüba mapang nung nisung kati pastor dak injang khaloktsü.

Anepdang züngia 2:00 ako meta Newark Central Ward area nung ShotSpotter device ajanga injang khadokba meteta police iba tesem jagi ao.

Pastor Timothy injang agi kanga mejungi yirua University Hospital-i anir ao.

"Injang khaloktsüba mapang nung Timothy Huff küna takdang nung liasü. Idangyongjisa pai ni kumzüktsü atema pa temang agi nokdanga liasü," ta pa kinüngtsü Hudson-Huff-i metetdaksü.

CCTV noksa nungji tetsür ana Huff'er

kidangi aruba sülen tena rongnung kati pistol agiteta pastor dak injang khaloktsüba noksa lir.

Pastor Timothy surgery anaben tashi agia injang agiteta indokogo.

"Pa temelungjang anasa azü jajaba tezü nungi azü ayim. Tangbo pa tezungjang agia mapa meinyaker. Doctor temi pa tepokpok-a tesimal indoktsüogo," ta Hudson-Huff-i metetdaksü.

Pastor tang dialysis agidar aser temang kanga mejungi lir, ta par kinüngertemi metetdaksü.

Pastor o kinüngtsü na tanur 8 sosema lir aser semchir 18 lir.

Supreme Court-i baptitsüba ken o ka nung Khristan putir ka maitsür

August 28, 2023: Gujarat state nung anti-conversion ozüng kübok police-i Khristan putir ka anema inyaksü liasü saka India nung tematiba court (Supreme Court)-i nokdangogo.

Tamangba yimsü balala amanger apuani na chir ka tzü nung baptitsüba atema police-i Khristan putir ka anema ken o benoka liasü.

Jesuit putir, Cedric Prakash-i, "Putir (security atema tenüng mamshir) jagi tanurji tzü nung baptitsü, kechiyong tanur tetsüji Khristan aser tanur jagia tetsüi amanga yimsü amang," ta metetdaksü.

Ato kilonser Narendra Modi'er state Gujarat nung 2003 kum anti-conversion ozüng benoka liasü.

August 28, 2023 nü osangbener den jembidang Gujarat nung

meimchir temeden atema inyaker Prakash-i, "Iba ya Khristan putir ka tiyazü nung aitsütsü atema tim masüba nung anti-conversion ozüng amshiba ken o lir," ta metetdaksü.

Paisa, "Supreme Court-i tim dang inyakogo," ta ashi.

August 25, 2023 nü Chief Justice D Y Chandrachud, Justices J B Pardiwala aser Manoj Misra nungeri akümba bench-i Khristan putir anema benoka aliba ken oji agientsüogo.

Tawa Gujarat High Court-i putiri mepishiba ken o magizükba sülen pai maneni Supreme Court nung kasa temepishiba ken o agüja liasü.

Ken o angadanga mapang nung putir-i Gujarat High Court dang, tanurji baptitsütsü atema tetsü aser tebu napronglai

melunga dang liasü, ta metetdakja liasü.

Ajisüaka high court-i, putir-i sorkar dang nungi temelaba magii tanurji baptitsü; tanur tebuji Hindu lir, anungji sorkar dang nungi tama temelaba meshitsüla, ta obendang agüja liasü.

Iba ya 2012 kum atalokba lir; 2014 kum tanur tebu jagi ken o ka agütsüba sülen police-i iba ken o bushisüngdanga anena liasü. Ajisüaka 2020 kum nung police-i ano asentenshir, putir jagi Gujarat Freedom of Religion Act ozüng alema inyakogo, ta shia tanaben bushisüngdang tenzük.

Putir Prakash ya meimchir temeden atema inyakba telok ka nung densema lir aser iba telok jagi state balala nung anti-conversion ozüng benokba anema Supreme Court nung ken o benoka lir.

ANOGO ABEN TSÜNGREM DEN

Tangashiba tenarong

"Saka nenok pei sasa külakokdakja tangashir dang mekümi inyaker kumang" (Yk. 1:22).

Laishibai ashir - Tangashitsü karang saka tejembitsü meyilongi süang. Tsüngremi ainkar balala, yimya mapa balala aser shina yutsüba Tsüngrem o ajanga pututem nung nübur den jembir. Pa o nung ajemdaker tanü Pai ne dang kechi shinur ibaji angatsü nungdaker. Lokti lemsabaji kati ka o mangaba ajanga adoker.

Kibong nung tsüraburi chirnur aser chirnuri tsürabur ola senzüka metoktsütsüla. Anogo shia pei inyakba tesem nung meputep aser rarabangsen masü, melenshitepa aotsü dang nungdaker. Yimten tebilemtsü angatsü mulunga alitsüla aser tashiyim agi masü tangatettep aser amalitep nung aotsü merangtsüla. Alima petsaperong angudang iba ya yimya ka dang ta mepaidoktsüla.

Alima mekonga kümra tali nendaka Tsüngrem ola angashitsü meranga Pa sentong asoshi jembiba angashia alitsü tenarong kanga tongtipang.

Sarasadem leniba Hallow App million 10 ben dak tema download süogo



Alex Jones

August 28, 2023: nungi sadem-sadema K h r i s t a n t e m sarasademtsü atema sarasadem leniba item ya tashi tulu aliba Hallow app 2018 kum hadir lir ta ni bilema tenzükba sülen tang liasü. Ni sarasademba mapang shia kü nung linük 150 million 10 ben dak tema download süogo aser iba app ajanga sarasadem million 225 dak tema agiogo.

App Store nung top 10 apps nung mezüng züngokba Khristan app ji Hallow app lir; iba app ajanga Netflix, Spotify, Instagram, Amazon, Tiktok aser YouTube ajangteta No. 3 jenjang tongteta liasü.

Hallow app ya arrshi kum 29, Alex Jones-i 2018 kum tenzükba liasü.

Tamalen interview ka nung jembidang Jones-i, secular apps Headspace aser Calm ajanga tajangzük anguba nung ajemdaker Hallow app tenzüktsü atema pa ajungmesoa liasü, ta metetdaksü.

Jones-i, "Pei kidang

sadem-sadema sarasademtsü atema item ya tashi tulu aliba hadir lir ta ni bilema liasü. Ni sarasademba mapang shia kü melungjang nung Khristan yimsü dak sendakba dang imdangi arua liasü. Kangki, Tebu-techir aser tanela temeshi noksa dang imdangi aru, aser ibaji khenyongi balaka liasü," ta metetdaksü.

Iba sülen Jones-i pastor tem aser medemertem den sarasademba ya Khristan yimsü den ang sendaktepa alitsüa akok ta o lemtepa aruba sülen Jones-i Catholic meditation & prayer app ya yanglu aser 'Hallow' ta nungja agütsü; koba tetezü "temeshi akümstsü".

Tanübo alima tesem balala nung Khristan denominations ajaki anogo shia sarasademba nung lenitsü atema iba app ya amshir.

**AO OSHI ANGAZÜKDAK:
TANÜ ANGAZÜKTSÜBA OJANG**



Rür

(n) tzü kanga temekong agi akümba long (hailstone)

* Tzünglu arudang khenkhenbo rür tululu tsüker.

Rürdang

(v) Longzüka ayu, meketbang (surrounded)

* Arem nung pongzü jena moudaktsüsü atema lanurtemi rürdanga ayu.

OLONG PAITEP # 6619

	1			2	3			
4			5					6
					7			
	8							
	9		10			11		
					12			13
14								
					15			

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsümapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6618 TELANGZÜBA



TIPIEN :

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem,
- 25. Süra.

LANGTSÜNGLEN :

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Taju, 21. Ano, 22. Onü,
- 23. Kua.

**Agüja aliba noksa nung meputepi
aliba 7 bushiang**



**Assam nung toll gates
tasen 18 lapoktsü**

Guwahati, August 28, 2023

(Agencies): Assam nung toll gates tasen 18 tashi lapoktsü sentong lir. Iba atema taküm April nung sangdong ka agüja liasü aser mulunga agizükra Assam nung toll gates 27 akümtsü.

Taküm April ita Assam Legislative Assembly session nung Chief Minister Himanta Biswa Sarma-i tollgate expansion maparen dak sendakba onüktem lemsatepa liasü.

Tang National Highway Authority of India (NHAI) kübok toll gates 9 lapoka lir aser ano toll gates 9 teyangludak lir. Maneni toll gates pezü yanglutsü agizükogo aser pungu renemogo.

National Highway Infrastructure Development Corporation (NHIDCL) aser NHAI yaritepa tollgate expansion project inyaker.



Miss Phek Contest 2023 takok angur Kevengo-u Ngotha (tiyongtsü) den tanabuba aser tasembuba jenjang takok angurtem Tsiawani Nyuwi aser Botoli Wozah nunger noksa nung angur. Iba tetoktepba ya August 25 nü Town Hall, Phek nung agi aser MLA Dr. Neisatuo Mero-i alakteta jaoker ka ama shilem agia liasü. Miss Phek Contest 2023 nung Kevengo-u Ngotha-i Miss Perfect 10, Tsiawani Nyuwi-i Miss Best Rampwalk & Miss Talented, Kovi Shupoa-i Miss Congeniality, Keduwe Wetsa-i Miss Multimedia aser Ruth Hoshi-i Miss Photogenic takoktem angu.

Assam-Meghalaya regional committee temi Langpih semdangtsü

Shilling, August 28, 2023

(Agencies): Assam aser Meghalaya nungi regional committees indang joint team kati September ita tashi nung Assam kübok Kamrup district aser Meghalaya kübok West Khasi Hills district anasa aliba Langpih semdangtsü.

August 28 nü Shillong nung aliba Hotel Pinewood nung regional committees ana senden amendang iba lemtet agi.

Iba senden nung Assam minister Chandra Mohan Patowary aser Meghalaya minister Paul Lyngdoh nati anir state anaprong nungi regional committee tem aden.

West Khasi Hills district den arrtsütepa aliba Kamrup district nung Lampi arrtsü ken o teti atema lemtet ka agitsü iba senden nung bangjemtep.

"Regional committee

anaprong senden tajung menogo.

Ashishitep aliba tesemtem ajema kümogo aser regional committee anaprongi state ana nung assembly session agiba sülen September tatemlen semdangtsü" ta Assam minister Chandra Mohan Patowary-i ashi.

"Iba mapang sendaktepa alir ajak tebilemba angadangtsü aser lemtet ka agitsü" ta Patowary-isa ashi.

Iba senden nung Kamrup Guardian secretary S Laksmanan, Kamrup district commissioner Keerthi Jalli, Deputy resident commissioner of Assam Bhawan Shillong, Monjit Sonowal aser Kamrup district SP o ADC nunger aden.

Meghalaya nungi West Khasi Hills atema regional committee chairman aser cabinet minister Paul Lyngdoh den MLA tem aser

züngsemtem aden.

Kamrup aser West Khasi Hills district nungi regional committee tem tan agi tanabenbuba senden menogo.

Langpih sector nung yimtsüng 200 tema lir saka yimtsüng 54 shi ka nung mangatettep lir ta osang angazükter.

Taoba mapang yimtsüng 7-8 kati Assam nung adentsü mulunga aliba shiogo saka yimtsüng 54-i Meghalaya nung dang dennür.

Meghalaya regional committee-i maps, land documents aser developmental schemes indang osang agütsüogo.

"Onoki November ita tashi nung tembangnür. Onoki küm tatemlen chief minister anaprong nem report agütsünür" ta Assam sorkar kati ashi.

Assam sorkari ACS officer Mukul Kathar mapa nungi anentsüogo

Diphu, August 28, 2023

(Agencies): Assam state sorkari Karbi Anglong Autonomous Council (KAAC) nung Secretary Mukul Kathar (ACS) mapa nungi nungi anentsüogo. Kathar-i tetsür ka dak teka sangshiba aser pa kinungtsü dak prangpong agi tuitba atema mapa nungi anentsü.

Iba tatalokba atema KAAC Principal Secretary-i osang agitepba sülen state sorkari iba

lemtet agi. Mukul Kathar-i tetsür ka dak teka sangshiba aser pa kinungtsü dak prangpong amshia merenshiba atema aitsür.

"KAAC Secretary, Rajeshan Terang-i iba tatalokba atema bushisüngdang asü. Idangji Mukul Kathar-i Smt. Sengpi Teronpi dak teka aiba aser pa kinungtsü Smt. Lindalee Teronpi dak prangpong agi tuitba bushitet. Iba ya April 22,

2023 nü Diphu nung atalok aser Kathar-i ali nung injang khatokba Secretary Terang-i bushitet" ta Personnel Department-i metetdaksü.

Iba tatalokba dak sendakba nung Mukul Kathar anema Diphu Police Station nung ken o ana benoka lir.

Assam Services (Discipline and Appeal) Rules, 1964 nung Rule 6(1) nung lateta aliba ama Mukul Kathar mapa nungi anentsüogo.



**GOVERNMENT OF NAGALAND
DIRECTORATE OF INFORMATION TECHNOLOGY & COMMUNICATION**

(Below New Secretariat) Thizama Road
Nagaland : Kohima 797001

No. DIT&C/EST/SDC-62/2013(Vol.II)

Dated Kohima 28th August 2023

NOTICE INVITING TENDER

The Directorate of IT & Communication invites tender for Delivery, Installation & Maintenance of Security and Backup solutions for existing State Data Centre of Government of Nagaland.

The detailed tender documents can be viewed / downloaded from the following website, from 29th August 2023, 12 Noon (Server Time) to 21st September 2023, 2 PM (Server Time):

- 1. www.nagalandtenders.gov.in
- 2. www.nagaland.gov.in

Amendments/Corrigendum, if any will be hosted on the above website.

Sd/-
Tongtiliba Longkumer
Director, IT&C.

China-i COVID-19 dak sendakba tenokdangba agintsüogo

Beijing, Luroi/August 28 (Agencies): China sorkari COVID-19 dak sendakba nung tenokdangba balala agütsür aliba agintsüba sülen China-i aoertem ket nungi COVID-19 tendangba negative resuly menüngdaksü. 2020 küm tetenzüklen nungi wara dak sendakba nung tenokdangba balala agütsür aliba tembangdaksütsü asoshi iba ya alizüing tasen ka tongtetba lir. Foreign Ministry otongdar Wang Wenbin-i osangbenertem den

sensaksemba mapang iba temelenshi indang ya metetdakja liasü. China indang "zero-COVID" policy taoba küm December itang tembanga liasü. Küm ana asem ka ozüing tesashia benoka linük ajunga mokdanga ayuba sülen taoba küm iba ozüing aginogo, kong yimti ajunga mokdanga ayuba aser tashidak mena aliba nüburtem mapang talanglang quarantine süa ayuba densema liasü. Linük nung tashidak prokshia aoba aziüoktsü atema jenjang tesashi agiba nung

tanga linük nungi China-i arurtem ajak sorkari lemezüktsüba hotel tem nung hopta ka quarantine asütsü nüngdaka liasü. Tenokdangba balala agütsüba ajanga alima nung economy tulutiba rongnung tanabuba ya terenlok meyilongi aküm aser iba ajanga nüburtem aika mapa mongui aküm aser tanga mapang nung kodanga matalokdangba iba mapang nüburtem mesüngjemteti kuma sorkar anema nokdaksü tenzüka liasü.

Papua New Guinea-i Jerusalem nung Israel embassy lapoktsü

Port Moresby, Luroi/August 28 (Agencies): Papua New Guinea (PNG) Ato Kilonser James Marape-i taruba hopta Israel semdangba mapang Jerusalem nung linük indang embassy ka amenoktsü, ta pa office otongdar kati metetdaksü. Papua New Guinea-i embassy amenoktsü aser Marape-i taruba hopta Israel semdangtsü sentong lir asü ta asüingdangba mapang otongdar yagi Reuters news agency dang iba osang ya shitak ta metetdaksü. Papua New Guinea-i Israel den 1978 küm tesendaktep yanglu aser tang Tel Aviv anasa consulate ka amenoka lir aser Israel-ia PNG den Australia nung amendaker aliba embassy ajanga tesendaktep achaayanga

arudar. Israel indang Ministry of Foreign Affairs-i February ita ashiba agi, PNG-i 2023 küm Israel nung mezüingbuba embassy amenoktsü. Source balala ajanga osang agütsüba koba Israel Channel 14-i sangdonga liasü, iba osang nung embassy ya September 5 nü lapoktsü ta metetdaksü. Times of Israel-ia iba osang nung aibelen mali ta metetdaksüogo. Israel den tesendaktep aliba linük timba kati parnok indang embassy tem Tel Aviv nung amenoka lir. United States-i parnok indang embassy 2018 küm May ita Jerusalem belena liasü. Taoba tir Donald Trump-i sangdong ka ajanga US-i Jerusalem ya Israel yimtiba

ama agizükba sangdongba sülen iba jenjang ya agia liasü. Kosovo, Guatemala aser Honduras nungera parnok indang embassy tem Jerusalem nung amenoker inyaksanshia arudar. Middle East nung kümsa küm mangatettep adoka aruba nung Jerusalem ya-a teyongtsü ka lir. Israel-i iba yimti anütoklen ya 1967 küm atsüing aser 1980 küm international temzüing ozüing alema iba yimti ajunga atsüing liasü. Palestinian Authority (PA)-i Jerusalem anütoklen ya tarutsü nung Palestinian state yimtiba südaksüner, ajisüaka Israel nung lenirtemi iba yimti ya khenyongi melemdangi Israel yimtiba asütsü ta nenshia arudar.

Pakistan court kati Imran Khan indang sedition case agientsü


Islamabad, Luroi/August 28 (Agencies): Hombarnü Pakistan nung aliba court kati taoba ato kilonser Imran Khan anema 'sedition' (sorkar anema nokdaksü ajungmesoba) ken o ka agientsüogo, anungji ochimashi ken o nung ita tetenzüklen tepuokdak yua alisang nem anisüingzük terabo agütsür. Arishi küm 70 tain Khan-i lokti nung o jembiba ka sorkar anema nokdaksü ajungmeso ta tai tonglokja pa anema ken o ya March ita Balochistan province yimtiba, Quetta nung benoka liasü. Khan-i mepishiba sülen federal mesüra provincial government nungi iba ken o benoktsü nüngdaka aliba ama prosecutor temi temelaba mongutet, ta Balochistan High Court-i ashi. Item taitüsüba ya ozüing agi melaba ketdangsür nungi temelaba mali aser yangji 'legal effect' kecha mali, ta court ajanga obendang agüja ken o agientsü. "Tsüingrem tenüing sangti," ta Khan indang okatsür Naeem Panjutha-i pelaba osang ka taoba mapang Twitter ta ajaba X nung ashi. 2022 küm April ita parliament

nung no-confidence vote agitepdang tamakok ajurua yimsüsüba menden nungi atsüingdokba sülen Khan anema ken o aika benokba rongnung iba ken o ya ka liasü. Ano ochimashi ken o nung pai aija küm asem tepuokdak ayutsü obendang agüja aliba asoshi Khan-i mepishiba nung ajemdaker Islamabad nung aliba high court kati Hombarnü obendang ka agütsütsü imlar. Pakistan nung tashi tait mitkartem den tesendaktep mejungi akumba sülen Khan tashi sama aser pai nüburtem teyari bushia nübuyimba ajanga linük nung yimtenren tsütsü mepetmesü tulu adok. Pakistan nung November ita general election agitsü imlar, saka taruba küm tetenzüklen tashibo magitetsü mesüka lir. Iba election nung Khan-i metokteptetsü aser pa küm pongu tashi yimtenren nung shilem magitsü tenokdangba agüja lir. Linük rongsen agiba aser sorkar anema nokdaksü ajungmesoba ken o tem dang masü ano Khan anema kiralongraba, May ita pa bukumer temi mitkar aser sorkar office tem amakba, June ita Supreme Court lawyer ka

tepsetba atema ken o balala benoka lir. Taoba küm Imran Khan ato kilonser menden nungi atsüingdokba sülen ozüing alema pai parliament shibangtsüba asoshi ano okatsür Abdul Razzaq-i Balochistan High Court nung ken o ka benoktsü meranga liasü. Razzaq ya Quetta nung khasetba sülen tebu khasettsü Khan-i totuyuba agütsü, ta par Razzaq'er jabasoi tai tongloktsü, saka Khan-i yangji pa shilem mali ta ashir.

KIBUBA DANGI OOR KÜM 1 AJUNGBA BILEMTETER

ASO :
03/03/1931



ASÜ :
29/08/2022

Asür L.N. Sashi

Nai onok toksür oor tanü küm ka ajunger saka onok mulungjang nungi na kodanga mepilar. Ne menürem jakden, shisatsü aser temeim onoki mamateter. Nai inyakba mapa tajungtem bilemteta tanü onoki ne nem tenüngsang agüja amonger. Nai akümlidang inyakba mapa tajungtem kodanga mesamatsü. Na meliakasa ne tawabangba akhüm kübok onok teti alir. Na teti tatem makadak tesünep nung aliba meteta onok mulung süngzükter.

~ Kodanga amadoktsü makokba Temeim kinungtsü, chirnurtem aser sosemtangsem.





Electronic Toys Industry atema development of solutions nung küm ka R&D Activities asoshi CDAC, Noida ajanga **Engineering Graduates (SC/ST/North-East Region Communities)** nungi application meshir. Küm ka atema ita shia taa sen 25000 alitsü

Eligibility: Electronics, Electronics & Communication, Applied Electronics aser Instrumentation, Robotics & Automation, CSE & Allied branches of CSE (AI, ML, IT, IoT ect) nung 2023-2024 nung Engineering Graduates passed/passing out.

Selection Procedure: Eligibility criteria tonger aliba candidates tem parnok indang problem-solving approach aser interview performance nung ajemdaker shimtsü.

Important Dates

Last date of Registration: Thu, 31 Aug 2023
 Problems Assignment: Mon, 4 Sep 2023
 Last date for sharing the solution: Thu, 14 Sep 2023
 Interview dates: Wed-Sun, 20-24 Sep 2023
 Notification to selected candidates: Tue, 26 Sep 2023
 Batch start date: Tue, 3 Oct 2023



Scan for registration

Interested Candidates to fill up Registration Form:
<https://forms.gle/JWLFzj5URSntRQ1q8> For queries email at: toyproject@cdac.in

CBC 06130/12/0002/2324

Taliban-i tetsürtem bendang lima nung shisaluyimtsü memolunger

Kabul, Luroi/August 28 (Agencies): Tetsürtem bendang lima nung azüingtsü scholarship angurtem Afghanistan nungi maotsü Taliban-i July ita tenokdangba agütsü. Taliban-i tetsür 60 dak tema apu aser parnok ajak ya university jenjang nung azüingtsü asoshi United Arab Emirates (UAE) bushia aotsüba liasü.

UAE nung aliba University of Dubai nung azüingtsü asoshi iba scholarships ya December 2022 nung Emirati billionaire businessman Sheikh Khalaf Ahmad Al Habtoor-i sangdonga liasü. Mezüing yongi bendang lima nung aliba Afghan tsürtem dang Dubai-i ao. *(Maneni tapak 8 nung...)*



Russia nungeri Ukraine sepaitem pua aliba chiokang ta takhangba agüja nüburtem Ukraine yimtiba, Kyiv nung aliba Independence Square nung adenshia aliba noksa nung angur. Noksa nungsa Russia nunger indang tanks tem yua aliba angur.

World Athletics Championships nung Chopra-i gold angu



Luroi/August 28, 2023 (Agencies): India nunger javelin throw asayar Neeraj Chopra-i Deobarnü Budapest, Hungary nung World Athletics Championships 2023 nung gold medal ka nguogo. Pai nulet meter 88.17 tsüteta liasü.

Kasa asaya nung Pakistan nunger asayar Arshad Nadeem-i (87.82m) silver medal aser world number 1 Croatia nunger asayar Jakub Vadlejch-i (86.67m) bronze medal nguogo.

India nunger asayar yagi asaya junga metenzükter aser pai mezüngbuba merandangbabo foul liasü. India nunger rongnungi Manu-i

m78.44 aser Kishore Jena-i m 75.70 atsü aser mezüngbuba round nung asayar ajak rongnungi Finland nunger Oliver Helander-i nulet talangtiba tsüteta liasü.

Tanabuba round nung world number 1 Vadlejch-i nulet meter 84.18 tsüteta pa tejakdang liasü saka Chopta-i meter 88.17 tsüteta pa tejakdang aküm.

India nunger athlete tem rongnungi World Championships nung Neeraj-i mezüngbuba gold medal ka ngutetogo. Pa masüdüng long jumper Anju Bobby George-i bronze medal ka aser Neeraj-isa taoba küm silver medal ka

ngur liasü.

Tasembuba round nung Pakistan nunger asayar Arshad Nadeem-i nulet meter 87.82m tsüteta pa tanabuba jenjangi atu.

Iba sülen round pongububa nung Vadlejch-i nulet meter 85.67 tsüteta pa tasembuba jenjangi atu. Neeraj-ia iba round nung nulet meter 87.73 atsü saka pai tanabuba round nung meter 88.17 tsüteter aliba majangtet.

Arishi küm 25 tain Neeraj-i tang tashi nung Tokyo Olympic gold ka, Eugene nung taoba küm World Championship nung silver, Asian Games aser Commonwealth nung gold medal ngua lir aser tang iba asayamung nung gold medal ngutetogo.

Chopra-i Hokolbarnü qualifying Group Around nung nulet meter 88.77m tsüteta World Athletics final atema jenjang ka nguteta liasü. Iba alizüng tongtetba sülen pa taruba Paris Olympics atema-a qualify süogo.

Paris Olympics atema qualification mark ji 85.50 meter lir, koba Neeraj-i ayong ayonga ajangetetogo.

Hyderabad FC-i Felipe Amorim alizükogo



Luroi/August 28, 2023 (Agencies): Bendanger asayatem indang contingent tashi itshidakja Hyderabad FC-i, Brazil nunger striker Felipe da Silva Amorim alizükogo, ta club sangdong ka ajanga Hombarnü metetdaksü.

Arishi küm 32 tain asayar ya HFC nungi küm ka asayatsü atema tenanzüktepba yangluogo aser pa 2023-24 season metenzük tsüingda team nung densemogo.

"Kü nükjidingji iba club atema takok bener arutsütsü asoshi lir aser Indian Super League nung asayatsü atema yongya atar," ta Amorim-i ashi.

Brazil nung asoba football asayar Felipe-i, pa indang football career ya pa asoba jila nung tenzük aser iba sülen 2016 küm Fluminense nung aden.

Iba sülen pa Thailand nung

Suphanburi club nung oa aden aser taoba season asem iba club nungi asayaogo. Iba club nungi pa asaya 100 shi nung asayaogo aser 2021 küm Thai FA Cup dena kokogo.

Pai tajangshiba aika bona lir aser pa HFC team nungi asayatsü atema yongya atadar. "Nü kü tajangshibatam club nung lanurtem nem belenzüksüner," ta Felipe-i ashi.

"Ni kü teammate ajak asoshi tatishitsü tajung ka kümner aser team ka ama onoki taruba season nung meranga inyaksü imlar," ta pai shisem.

Felipe shibai wing aser teyong nunga asayateter, pa ya Brazil U20 team nungi asayaogo aser AFC Champions League nunga asayaogo aser tanü tashi nung pa league balala pongu nung asayaba mapang league tenet tashi koka lir.

Saudi Arabia-i national team coach asütsü Mancini shim

Luroi/August 28, 2023 (Agencies): Saudi Arabia national team coach tasenba asütsü atema Roberto Mancini shimba sangdongogo. Osang ajanga ashiba agi pa den küm ka nung USD million 25 dak tema agütsütsü asoshi tenanzüktepba ka yangluogo.

Iba ita tetenzükten pai Italy coach mapa toktsütsü telemtetba agiba sülen tang iba mapa agizükogo.

Herve Renard-i national team coach mapa tokja France tetsür team coach mapa agizükba sülen Saudi pur coach maliasü.

Arishi küm 58 tain Mancini-i anir Italy team-i 2020 Euro akok ajisiüka taoba küm World Cup atema qualify mesütet.

"Saudi Arabia national team manager asütsü maongka agütsüba atema kanga pelar. Kü atema tanga linük ka nung



tajangshiba angutsü asoshi iba ya maongka tajung ka lir," ta Mancini-i Deobarnü ashi, shibai küm pezü atema tenanzüktepba ka yangluogo.

Saudi Pro League nung team tem atema Europe nung club tem nungi asayar aika alizüka Saudi Arabia-i jenjang tulu ka agiogo.

Cristiano Ronaldo January ita Al Nassr nung oa adenba sülen nungtugu asayatem aika Saudi Arabia-i ogo, kong tesüsa Brazil nung nungtugu asayar Neymar-a Saudi nungertemi sen

aika agütsüba agi atsüa arua Saudi Pro League nung asayatsü telemtetba agiogo.

Mancini-i Italy coach mapa toktsüba aika atema taoksatsüka liasü, kechiyong iba ita tetenzükten pa nem linük Under-21 and Under-20 team tem dena achaayangtsü asoshi nongloksür liasü.

Saudi-i aotsü atema sen aika agizüksü asoshi pa renema lir ta osang adokba sülen pai iba telemtetba agiba atema kanga mejungi aija liasü. Ajisiüka pai ashiba agi, pa Saudi-i aoba ya senyong masü ta shiogo.

Mancini, shibai taoba Napoli coach Luciano Spalletti melena liasü, pa küm pongu Italy coach mapa inyakba mapang takok aser tamakok aika nguogo.

Asayar ka ama Mancini-i Sampdoria nungi asayaba mapang 1991 Serie A title aben aser Italian Cup pezü koka liasü.

Kei Nishikori US Open nung shilem magitsü

Luroi/August 28, 2023 (Agencies): 2014 U.S. Open runner-up Kei Nishikori-i, taküm atema tatembangbuba Grand Slam nung shilem magitsü atem telemtetba agiba Deobarnü sangdongogo.

Pa temekok tabelen yiruba sülen ita tepeyong masayateti arur tetsüng tajungba makümba ajanga iba asayamung nung shilem magitsü lemtetogo.

Flushing Meadows nung asayatsü aliba iba asayamung atema Nishikori melena James

Duckworth, shimogo, shiba qualifying nung tamakok ngur liasü.

Duckworth ya Mongolbarnü U.S. Open mezüngbuba round nung Felipe Meligeni Alves den asayatsü.

Taküm asoshi US Open ya Hombarnü nungi tenzükogo.

Arishi küm 33 tain Japan nunger asayar Nishikori ya 2022 küm January ita hip surgery agia liasü. Iba sülen pa July ita ATP Tour-i meyipa arua Atlanta nung asaya aser pai asaya ana koka quarterfinals

tongtet, ajisiüka Taylor Fritz-i tsükdakja liasü.

Iba sülen Nishikori temekok nung timtem aliba ajanga Washington nung masayatetsüsa aküm aser tang tashi asayamung ka nung danga shilem magi-i arudar.

U.S. Open semifinal nung Novak Djokovic akokba sülen ita trok shi lir pa 2015 küm ATP world ranking jenjang 4buba tashi tua liasü. Pa ya Asia nungi Grand Slam kija asaya nung finaltonga asayaba mezüngbuba asayar liasü.

Taliban-i tetsürtem... (Tapak 7 nungi...)

Tetsür kaketshir kati osangbener dang ashiba agi, July 23 nü lar kinunger tebur kar den la airport bushia ao. Saka la airport atongdang teimla ajak sama.

"Taliban ketdangsür temi onok indang tickets aser student visa tem angudang, tetsürtem student visa nung Afghanistan yutsür aotsü memelar ta ashi," ta kaketshir tetsür la yagi ashi.

Lai ashiba agi, la den ano tetsür 60 shi airport nungi meyipa yok. Tetsürtem ya kisüng senzütsü memelar, anungji parnok den kinunger tebur kabosa alitsüla. Tetsür kaketshir asem den parnok kinunger tebur ka tayimtsü nung amen, saka Afghan Ministry of Vice and Virtue ketdangsür temi parnok tayimtsü nungi anizük.

Tetsürtem jashiseta parnok khu anasa teimla samar nokdaka aliba noksa nguogo.

"Yangi university tem shibangba sülen iba scholarship yagi künu nem teimla tasen ka agütsü. La teimla nungi kidang nungi ao saka nüktzü yima

meyipa shilang. La indang temeden ajunga agienogo," ta tebur kati osangbener dang ashi.

Iba nisungba yagi ashiba agi, tetsürtem ya karbo kanga sensaker aser visa atema sen apur liasü.

University of Dubai aser Sheikh Khalaf Al Habtoor nungeria kaketshirtem airport nung soitba tejangja shiogo. Pai X (taoba mapang Twitter ta ajaba) nung video ka lemsatepba nung Taliban aitsü aser Islam kübok tetsür aser tebur ajak kasa lir ta ashi. Airport nung soitba Afghan tsür kati English nung jembiba iba video nung inoksema liasü.

"Onok tang airport nung lir, saka tia maka sorkari onok Dubai-i meyoker. Kinunger tebur temi meina arua alirtema meyoker. Ni kechi inyaksüar memetet. Imlibilema onok yariang," ta tetsür kaketshir yagi ashi.

Ministry of Vice and Virtue indang odongtar Mohammad Sadiq Akif Muhajir-ibo osangbener dang parnoki item tatalokba memetet ta ashi.

BILEMDANGANG

"Lokti-i masü saka kijai lokti bushitsüla."